

Chhuah fan - Oct. 1984

JANUARY, 2015

(MISSION)

# RAMTHAR



Email: [ramtharchanchinbu@gmail.com](mailto:ramtharchanchinbu@gmail.com)

Fax No. 0389-2316410



## 'RAMTHAR' EDITORIAL BOARD-IN KOHHRANHO KUM THAR CHIBAI CHIBAI A BÛK A CHE U



**Chhim Bial Masihi Sangati Milit Samiti - 2014  
Convention Vawi 4-na Thuhritu leh a rawngbâwpuite**

Moderator Kum Thar Thuchah.....phêk 6-8

**Ramthar Association Chanchinbu Thla kip Chhuak****Editorial Board 2013 - 15**

Editor	: Rev. Thangzauva	9612950043 (M)
Joint Editors	: Upa Lalrinmuana	9436142643 (M)
	Upa Zoramthanga	9436362385 (M)
	H. Lalnguriani	9774390980 (M)
News Editor	: Lalbiakenga Fanai	9436366234 (M)
Cir. Manager	: Lallawmnakima Hmar	8575178109 (M)
Publisher	: Rev. Lalchhuanmawia	9615952406 (M)

**Member-te**

Rev. K. Lalhmuchhuaka	: Synod Moderator
Upa H. Zoliana	: Synod Secretary(Sr.)
Rev. P.C. Pachhunga	: Exe. Secy./c. Mission etc.
Rev. C. Chawngliana	: BEC Member
Upa F. Lalfakzuala	: BEC Member

📧 Thu chhuah tûr nei chuan Email - ramtharchanchinbu@gmail.com-ah emaw lehlam chauhah ziakin Editor emaw Manager, Ramthar Chanchinbu, Synod Office, Aizawl, Mizoram (India) hnênah emaw thawn tûr a ni e.

📧 Ramthar Chanchinbu thu chhuah hi a ziaktu mawhphurhna a ni.

**KUM KHAT LÂK MAN - ₹ 50/-****A CHHÛNGA THU AWMTE**

- |                                       |         |
|---------------------------------------|---------|
| 1. Editor thukhawchâng                | - 1     |
| 2. Keimahni                           | - 2-4   |
| 3. Ramthar Hluttute Huang             | - 5     |
| 4. Moderator Kum Thar Thuchah         | - 6-8   |
| 5. BUHHMUN AṬANGIN:                   | - 9-16  |
| (1) Chhim Bial Masihi Inkhâwmpui..... |         |
| (2) Chikhûrlui Outreach               |         |
| (3) Brain tumour (cancer) a dam       |         |
| 7. Mizo Pasalṭha huaisen...           | - 17-18 |
| 8. Lalpa tâna Pasalṭha                | - 19-22 |
| 9. Hun puma rawngbâwl tûra kohna      | - 23-24 |
| 10. Ramthar Feh                       | - 25-31 |
| 11. Sunna                             | - 32    |



## KUM THAR CHIBAI!

Pathian hruaina azârah kum thar 2015 chu kan lo thleng leh ta reng mai. A va han lâwmawm tak êm! Min hruai thlengtu Pathian hnênah lâwm thu i sawi ang u. Ramthar Chanchinbu chhiartu zawng zawngte Editorial Board member-ten chibai kan bûk vek a che u.

He kum thar hian kan chungah eng nge a rawn thlen dâwn tu man kan sawi lâwk thei lo. Hun leh kumte hi Pathian tâ, a kuta awm a ni a. Khawvêl leh a chhûnga awm zawng zawngte pawh hi a tâ, a thuhnuaiia khawsa, awm leh chêng kan ni. Chuvângin, Pathian kuta tlûk luh hi kan bat leh tihmâkmawh hmasa ber a ni.

Kum 2014 liam taa kan rawngbâwlnate kha thlir kir ila. Tihfel tâwk loh te, hlawhchham te kan nei a nih pawhin mahni insiam ṭhaa, ṭha zâwk leh ṭangkai zâwka rawng kan bàwl theih nân ṭan i la thar leh ang u.

Pathian thlawhhamá, Pathian huanah hna kan thawk a, a neitu lungawina tûrin inpe thar leh ila. Kan hmahruaitu Lalpa en chungin, ‘*Kum tir aṭanga a tâwp thlenga a mit fûkna*’ kan ni tih inhriain, rinna, beiseina leh hmangaihna nên Lalpa rawng i bawlin i inpe thar leh ang u. Amah ngei chu kan hmahruaitu a ni dâwn si a.

• • •

**K E I M A H N I**

† **SMB Jan-Nov 2014 ringthar:**

**SMB JAN-NOV 2014 RINGTHAR DINHMUN**

Sl.No.	Buhmun	Mission ary	Jan-Jun	Jul-Sept	Oct	Nov.	A vaiin
1	Aru. E'	72	<b>22</b>	<b>50</b>	4	18	<b>94</b>
2	Aru. W'	104	<b>142</b>	<b>276</b>	35	42	<b>495</b>
3	Assam	76	<b>60</b>	<b>67</b>	2	7	<b>136</b>
4	Barak Area(JPM+Presby)	86	<b>155</b>	<b>273</b>	17	14	<b>459</b>
5	Cachar Tlang	78	<b>45</b>	<b>106</b>	<i>dawn loh</i>	9	<b>160</b>
6	Delhi	18	<b>47</b>	<b>83</b>	4	3	<b>137</b>
7	Home Mission 'N'	172	<b>79</b>	<b>106</b>	26	9	<b>220</b>
8	Home Mission South	231	<b>106</b>	<b>205</b>	14	77	<b>402</b>
9	Jharkhand	33	<b>340</b>	<b>495</b>	71	82	<b>988</b>
10	Karbi Anglong	127	<b>106</b>	<b>191</b>	<i>nei lo</i>	11	<b>308</b>
11	Kolkata	31	<b>264</b>	<b>453</b>	61	12	<b>790</b>
12	Lucknow	31	<b>204</b>	<b>301</b>	47	38	<b>590</b>
13	Nepal	42	<b>131</b>	<b>177</b>	15	22	<b>345</b>
14	Patna	33	<b>133</b>	<b>193</b>	4	11	<b>341</b>
15	Siliguri	33	<b>70</b>	<b>76</b>	<i>nei lo</i>	12	<b>158</b>
16	Tripura	141	<b>1000</b>	<b>459</b>	134	124	<b>1717</b>
17	Mizoram Masih Sangati	8	<b>551</b>	<b>762</b>	223	123	<b>1659</b>
	<b>July-Dec 2014</b>	<b>1316</b>	<b>3455</b>	<b>5273</b>	<b>657</b>	614	<b>8,999</b>

† **TUARPUINA: (1) Thawktu thi - Pu T. Vanlalruata**, Headmaster, Damdep-I, Home Mission South-a thawk chu ni 10 November, 2014 (Thawhtanni) zing dâr 6:50 khân Aizawl Civil Damdawi Inah a thi a, hemi ni vêk chawhnu dâr 1:00-ah Rev. Lalchhuanmawia'n anmahni in Ramhlun Vengthlang-ah a vui nghal. A sūnna phêk 32-ah en rawh. **(2) Pu C. Lalfakzuala, Evangelist Teacher**, Tuikawi, Home Mission South, farnu Pi Remzovi (60), chu thisen cancer avângin ni 24.11.2014 khân New Delhi-ah a thi a, Kohima-ah ni 26.11.2014-ah vui a ni. **(3) Pu Lalêngzuala, Evangelist**, Kachaharitol, Patna buh hmuna thawk fapa Vanlalringngheta chu ni 27.11.2014 khân mitliam avângin a thi a, an fa hmasa an chên a ni.

**(4) NI. Lalhunthari Evangelist**, Burburia Bial, Rambabu Kohhrana thawk lai (*Kolasib Diakkawn Kohhran chàwm*) ù, Vanlalpianga (26) chu pum ná avângin Ni 30.11.2014 Pathianni zânah a thi a, a tûk, Thawhtanni-ah vui a ni a. Ni 1 December, 2014 Thawhtanni zîngah a pi, Hmunlêthangi (a nú nû) a thi leh a. A ù vêk, Lallehkimi (31) chu ni 01.11.2014 tlaia a pi an vui zawh hnû lăwkah nau chungah (*internal bleeding avângin*) a thi leh a, a tûkah vui liam a ni. **(5) NI Rebeki, Health Worker**, Hmáwngbù pa Pu Kongso, Chawngtelui chu ni 4.12.14 zing dâr 12:15 vel khan Synod Hospital, Durtlângah a thi a, a ruang hi an khua Hmáwngbù-ah vui a ni. **[6] Ni 07.12.2014 khân Pu K. Lalhmingthanga** (64), *missionary pensioner*, Karbi Anglong leh Home Mission North-a thawk thîn chu *cancer* natna avângin an chênna in Kanan vengah a thi. A tûkah vui a ni. **[7] Dr. Laldineni, Lecturer, MTC** pa Pu Tlangmawia (84), chu ni 08.12.2014 khân Aizawl Civil Hospital-ah *asthma* avângin a thi a. An khua Sairang-ah vui a ni.

Hêng lusûn chhûngte hi SMB-a an thawhpuite'n an tuarpui tak zet a, Pathian thlamuanna an chan ngei nân duhsakna an hlân a ni.

† **CONSULTATION-AH TEL:** Ni 5-6 November, 2014 khân *North East India Congress on Church in Mission (NEICOCIM)*-in Guwahati-a *Consultation* an neihah Rev. Lalchhuanmawia, Secretary (SMB) chu telin SMB rawngbâwlna chanchin leh hmalâk mēkna a sawi chuan ngaithlatute rilru a khawh hle.

† **SIKUL SILVER JUBILI LÂWM:** Home Mission South-a Home Mission Sikul, Hmáwngbù chuan Nov. 25-26 khân *Silver Jubili* an lâwm a. Ni 25 Nov. 2014 khân Rev. Lalchhuanmawia, Secy. (SMB) chuan Silver Jubili Lungphun a hawng a, hun hlimawm taka

hman zui nghal a ni. Jubili hmanga kal pah hian mission hmalâkna hmun dang tlawhin an fang kual nghal a, ni 26 Nov. 2014 khân dam takin an haw thleng leh ta. Rev. Lalchhuanmawia hi Pu H. Vanlalchhuanga, *School Supervisor of Schools* (SMB)-in a ÷awiam a ni.

† **MISSIONARY CHAWMNA DAWNG:** SMB chuan missionary chàwmna Mizo Presbyterian Church of USA aṭangin ₹ 1,76,290 ni 12 November, 2014 khân a dawng, SMB-in Pathian leh Mizo Presbyterian Church of USA hnenah lâwm thu a sawi a ni.

† **CHHIM BIAL INKHÂWPUI:** (1) Ni 7-9 November, 2014 khân Masihi Sangati Inkhâwpui vawi 4-na, Lawngtlai Bazar Kohhrana neihah ringthar 40 baptisma chantir an ni. (2) Ni 20-23 Nov. 2014 Chakma Inkhâwpui vawi 10-na, Upa Dono Kumar, *Speaker* atâna hmangin Tuichawng-ah neih a ni. Ringlo mi ÷ahnem tâwk tak *campers* an nei a, ringlo baptisma chang 62 lai an ni, a lâwmawm hle.

† **DIPHU PASTOR BIAL ZAIPÂWL SYNOD-AH:** Vanneihthlâk takin Diphu Pastor Bial Zaipâwlte chu 2014 Synod-a zai tura hun pêk an ni a. Hun hman dân tûr ruahmansak an nih angin tluang takin hun an hmang, hetiangin - (1) Ni 10.12.14 zân Khatla East-ah. (2) Ni 11.12.14 chhûnah Hauhnar *recording*-ah hla an *record*. (3) Ni 12.12.14 zân Synod-ah an zai. (4) 13.12.14 chhûn Aizawl khawpui fan. Zân inkhâwm Chanmari Biak Inah (5) Pathianni chawhnu inkhâwm Chaltlang Biak inah. (6) Zân inkhâwm Mission Veng Biak Inah. (7) Ni 15.12.14 zân inkhâwm Kawnpui Venglai Biak inah an zai a, hlâwkpui hlein an inhria.

Ramthar chhiartu zawng zawngte KUM THAR chibai kan bûk a che u – Editorial Board

## RAMTHAR HLUTTUTE HUANG



***Pu Manphunga***  
***Govt. Complex, Aizawl.***

Chanchin Ṭha hril hi Kristian rawngbâwl hnaah chuan a pawimawh ka ti ber a. Chu rawngbâwlna chanchin târ lanna, Ramthar chanchinbu hi ka ngaihlu hle a ni.

Chanchinbu sem hi ka rawngbâwl ve theih tâwk a nih avângin hlim takin ka sem ṭhin. Biak In kawta sem mai pawh hi ka duh lo va, a latute inah ngei kalin ka sem kual ziah ṭhin a ni.

Ramthar chanchinbu aṭangin kan *missionary*-te rawngbâwlna chanchin bengvârlhâk tak takte leh an hmabâk tamziate kan hre thei a. Ṭawngṭaipui dân tûr kan hriatna hnâr ṭha tak a ni a. Chuvângin, Ramthar chanchinbu hi ka ngaihlu a, a lo thlen hlân ka nghakhlel hle ṭhin a ni.

• • •

## KUM THAR THUCHAH BUAIPUI THAM CHANCHIN ṬHA



Rev. Lalrinmawia  
Synod Moderator

*‘Chanchin Ṭha hi buaipui tham a ni’* kan tihna chhan chu ral leh mai tûr ni lo, chatuan daih thil a nih avàng a ni. A buaipuitute làwmman tûr pawh lallukhum chhe thei lo a ni. He Chanchin Ṭha hi a hmu chiang leh a hre chiang apiangten hlu an ti a, ropui an ti a. Paula pawhin, *‘Ka buaipui zêl dâwn, ka zahpui dâwn lo, ka chhuang zêl dâwn’* a ti a ni.

**1. Buaipui tûr Chanchin Ṭha:** Kan ṭawngkam hman lâr tak, chîk taka kan ngaihtuah ngai lêm loh chu *‘evangelism’* tih hi a ni a. *‘Evangelism’* kan tih hian eng nge kan sawi tih i han chhui chiang hmasa teh ang. *‘Evangelism’* chu *‘Chanchin Ṭha puang chhuak’* emaw, *‘Chanchin Ṭha duhsak taka mi dangte pe chhuak’* tihna emaw a ni a. He thumal hi Thuthlung Tharah wawi 52 lai hman a ni. Chu Chanchin Ṭha chu hril dân leh puan chhuah dân hrang hrang a awm thei a. Kan hril leh puan chhuah dân hrang hrang hian Chanchin Ṭha thutak a hlih bo tûr a ni lo.

Thil dang zawng zawng hi chu a hmanrua mai a ni tih kan hriat reng a ṭul. Chu Chanchin Ṭha chu eng nge

ni tih chhui zêl teh ang. *‘Lal Isua chu Pathian Lehkha Thu ang zêlin kan sualte avàngin a thi a, phûmin a awm a, a tho leh ta a. An sualte sima, amah ringtu apiangte chu an sualte ngaihdam sak an ni tih hi a ni. Pathian ringtute chanvo ropuizia leh a ring lote chanvo rapthlâkzia puan chhuahte hi a ni. Chu ngaihdamna, chhandamna chu a thàwna chan leh dawn a ni a. Mahse, a dawngtu chuan mahni kraws pua zui a ṭul thung si.’* Hei hi Chanchin Ṭha kan tih ber chu a ni.

**2. Chanchin Ṭha buaipuitute:** Chanchin Ṭhain a khawihte leh Chanchin Ṭha dawngtute chuan an buaipui lo thei lo vek mai a. Chutih lai chuan, a hril



darh tùr leh puang chhuak tùra thlan leh ruat leh kohte hi chu an awm a. Chûngte chu ‘*rawngbáwltu*’ tiin emaw ‘*missionary*’ tiin emaw kan ko thín. Ringtu zawng zawngte hi engkim kalsana Isua zui tùra koh kan nih vek laiin rawngbáwl tùra koh leh thlante chuan mawhphurhna an nei zual bîkin a lang.

Lal Isuan Chanchin Ṭha hril tùra a zirtîrte a tirh khân Chanchin Ṭha chauh hrila, buaipui tùrin a tîr chhuak a ni. Lal Isua a thiha, a thawhleha thu te, a ringtute chan tùr ropuizia leh a ring lote chan tùr rapthlâkzia sawi tùr a ni a. Lal Isuan thil danga inham buai lutuk a phal lo (Mt 10:9-10). Tûnlai khawvêl hmasâwn chak takah hian mihringte hian mamawh kan ngah tawlh tawlh a, a lova awm theih loh ang hiala ngaih a tam ta hle mai. Hetiang kârah hian Chanchin Ṭha rawngbáwltute hi eng anga nung tùr nge kan nih ang? A rawng kan bàwlsak, kan zui Lal Isua hian a zirtîrte a tirh chhuah laia an awm dân tùr a sawi ang hi a la kéng nung zêlin, hetiang a awm tùr hian a la phût zêl ang em? Hetiang kher lo hian

rawngbáwl ta ila, min la pawm zêl tho ang em le?

‘*A ram leh a felna zawng hmasa ula, in mamawh chu a pêk belh chhah ang che u* (Mt 6:33)’ a tih hi a pawimawh hle a ni. Pêk belh chhah tùr buaipui avàngin Chanchin Ṭha hian a thawh tùr angin a thawh loh phah thei. Engkim kalsana zuitu chuan a chán vek a nih pawhin lâwm thu a sawi thei a. Pathianin a pêk belh chhah a nih pawhin Pathian ropui nân leh mi dang tâna malsawm nih nân a hmang thiam ṭhín a ni. A bîk takin, Chanchin Ṭha chauh buaipui tùra koh leh hlan bîk *missionary*-te tân phei chuan kan mawhphurhna ngaihtuahin khawvêl thil, tisa thila inham buai lova Chanchin Ṭha chauh buaipui a ṭul hle a ni. Kan khawvêlna hnuk chat lo chuan tu thlarau mah kan man lo vang.

**3. Thlarau Thianghlim nei rawh u:** Chatuan daih lo, ral leh mai tùr buaipui tùr chuan khawvêl finna a tâwk a. Sum leh pai tam tak neih dân ngaihtuahtu tân chuan khawvêl finna a tâwk. Mahse chatuan daih thil ngaihtuaha, buaipui tùr chuan Thlarau Thianghlim a ṭul. Chuvàngin, Lal Isuan a zirtîrte chu

Thlarau Thianghlim nei tûrin a chah a ni (Jn 20:22). Thlarau Thianghlim an neih hma chuan feh chhuah a phal lo (Tirh 1:8). Mi dangin Chanchin Ƨha malsâwmna an chan ve nân tuar a Ƨul a, mi dang an hausak nân retheih a Ƨul si. Chanchin Ƨha zâra mi dangin ropuina an neih nân a buaipuitute an mualpho a Ƨul Ƨhin. Mihring hmasâwmna bâk zêl thlen a Ƨul avângin Thlarau Thianghlim nei lo tân rawngbâwl a har Ƨhin.

Chanchin Ƨha hi phatsan a nih loh nân Thlarau Thianghlim a pawimawh Ƨhin. Stephana chu Isua avângi Chanchin Ƨha a buaipui avângi lunga an den hlum lai khân a déng hlumtu lam a en lo va, vân lam a en tlat a, ngaihdam a dilsak thei tih kan hria (Tirh 7:54-55). Rawngbâwlpuiten chanvo Ƨha zâwk, dinhmun Ƨha zâwk, awmna nuam zâwk chang bik nia hriaa, chu lam thlîrtu tân

chuan rilru ná tak leh vui hmui put a awl Ƨhin.

Hetih lai hian vân lama chan tûr, Lalpa min tiam thlîr lo tân lâwm thu sawi a har Ƨhin. Chanchin Ƨhain a hnathawh tûr ang a thawh theih nân a buaipuitu nunah chuan tuarnain a thleng Ƨhin a, chànain a thawk Ƨhin. Chumi ngam tûr chuan Thlarau Thianghlim nei lo tân a theih loh tawh lo va. Chuvângin, Thlarau Thianghlim a pawimawh Ƨhin. Chanchin Ƨha lâwmman hi chatuan chatuan daih thil a nih avângin thlarau lam thil a ni a, Thlarau Thianghlim neitute tân a ni. Thlarau Thianghlim neitute rawngbâwlna a nung Ƨhin a, miten Chanchin Ƨha malsâwmna an dawng Ƨhin a ni.

Chuvângin, ‘*neih zawng zawng hralha lei tlâk a ni*’ tiin Isuan a sawi. He Chanchin Ƨha buaipuitute tu mah an inchhîr ngai lo. Chatuan lâwmman hlu a ni dâwn si.

*(Kan sâwmna ngai pawimawha hun chêp taka kâra **Kum Thar Thuchah** Ƨha tak, Chanchin Ƨha hriina kawngah kohhranhote mamawh tak min ziahsak avângin kan Moderator chungah kan lâwm hle a ni. - Ed.)*

**BUH HMUN AṬANGIN**

**CHHIM BIAL MASIHI SANGATI INKHAWMPUI  
VAWI 4-NA**

*Pastor Vanlalruata*

*i/c. Chhim Bial, Masihi Sangati*

**Masihi Sangati awmzia:** Masihi Sangati awmzia chu *Kristian Inpàwlhona* Hindi-a sawina a ni. Tùnhma chuan Non-Mizo/Hnam dang zînga rawngbâwlna tih pawhin sawi a ni thin.

**Masihi Sangati thiltum:** Mizoram-a Masihi Sangati thiltum chu – Mizoram-ah India ram hmun dang aṭanga lo lût hnam dangte leh sakhaw dang biate hnênah Isua Krista chhandamna chanchin chu hmaih hauh lova hril kim hi a ni phawt a. Ringtute chu anmahni ṭawng thiam zâwng hmanga enkawl zui a, ringtu puitling, mahni rama an kir hnuah pawh Krista hretu dik tak nih chhonzawm zêl theiha siam hi a ni.

**Tùn dinhmun:** Mizoram pumah Masihi Sangati dinhmun chu hetiang hi a ni. Pastor 4, Area 18, Fellowship 200 chuang, Evangelist (Bial/Kohhran chàwm) 120, Gospel Team 2, Director 1 leh thawktu

dang eng emaw zât an awm (hei hi danglam reng a ni). Nikum (2013) chhûngin ringthar 1511 chuang baptis an ni. January – August 2014 chhûng hian ringthar mi 762-in baptisma an chang tawh a ni.

**Chhim lam dinhmun:** Kum 1990-ah Lunglei Chanmari Kohhranah Masihi Sangati hi din a ni a, chuta ṭang chuan Sangati hi Kohhran leh Pastor bialten a remchan angin hmun hrang hrangah an din belh zêl a. Tun dinhmunah hian Sangati 16 a awm. Area hnihah inṭhenin Lunglei Area leh Chhimtuipui Area te an ni. Lunglei area-ah hian Sangati 7 a awm a. Masihi Sangati (Hindi)-ah hian Lunglei

Chanmari, Lunglei Bazar leh Lungpuizawl te an awm a. Hnambil Sangati-ah hian Tripuri Lunglei Electric Veng, Santal Lunglei Venglai, Meitei leh Nepali Lunglei Ramthar Vengah te a awm.

Chhimtuipui *area*-ah hian Sangati 9 a awm a, chungte chu – Hindi-ah Saiha, Sangau, Maubawk Vengthar (Zero), Lawngtlai College veng, Bungtlâng ‘S’ Bazar leh Hmunnuam. Hnam bil Sangati-te chu – Meitei Lawngtlai leh Saiha, Nepali Saiha Tlângkawn.

Lunglei *area* leh Chhimtuipui *area* te hian kum tin a hrangin inkhâmpui an nei òin a. Heng *area* hnih inkhawmpui bakah hian Chhim pum pui inkhâmpui (*convention*) hi kum khat danah neih òin tawh tura tih a ni baw.

Ni 7-9 November, 2014 chhûng khân Pu R. Lalchhanhima, Synod Office, chu thuhritu atâna hmangin Chhim

Bial Masihi Sangati Inkhâmpui, Lawngtlai Bazar Kohhran-ah hman a ni a. Rev. Lalrinnunga, *Admin. Secretary* leh Rev. Lalthlanpuia, *Director*, Masihi Sangati Kendra te pawhin he hun hi mi an hmanpui thei nghe nghe a ni.

Thuhritu hi zaia rawngbâwl na neiin Nl. Lancy Remlalhruaï leh Tv. Zosangzualate’n an òawiam a, Tuikual Kohhran a’angin Pu K. Lalankima’n a rawn òawiam baw. Anni bâkah hian Aizawl a’angin Syion Swaram (Zaipâwl) leh Chhinga Veng Bial Masihi Sangati Zaipâwl-te’n zaia rawngbâwl na nung tak mai neiin hun an hmang a, khaw hrang hrang a’anga Masihi Sangati zaipawl rawngbâwl na a ropui hle a, inkhâmpui an tiphuisui hle a ni. A thlengtu Kohhran leh Tirhkohte òahnemngaihna nasa tak avângin ringthar baptisma chang pawh 40 lai kan nei ta nghe nghe a ni. Lalpan Kohhranho òawng’aina a chhâng kan ti lo thei lo.

**A pawimawhna:** Masihi Sangati rawngbâwna hi a pawimawh hle. Mizoram páwna kohhran ðang duang tak tak te hi Masihi rawngbâwna rah chhuah kan ti lo thei lovang. Kan awm hmuna hnam dang unaute zinga theihtâwpa kan lo thawh hian ram páwna rah ða tak chuah zêlin kan ringthar siamte hian Chanchin ða hi kan thlen phâk lohna, an ram lamah te an hril darh zêl a. Tûna kan *Mission Field* tam zâwk a lo din theihna chhan chu he laia kohhran mipuiten theih-tâwpa Masihi Sangati kaltlanga ringthar kan lo siamte bul ðanna aþanga lo ðang duang cho an tam khawp mai. Chuvâng-in, ram páwna missio-

nary-a kal thei lote tân Pathianin kan awm hmunah kan *mission field* (ringlote hnêna Chanchin ða hrilna kawng) min lo hawnsak hi theihtâwp chhuahin ðan i la zêl ang u. Lal Isuan vâna a lawn dáwna a thuchah hnuhnung ber ‘*Chutichuan kal ula, hnam tina mi zirtîrahte siam ula*’ (Matthaia 28:19) tiin ringtu tawh phawt chu min ko a ni. Hêng kan unau hnam dang ring lote hnênah Lal Isua thupêk pawihmawh ber Chanchin ða hril tûra koh kan nih hi i hre thar leh ang u. Kan chheh vêla mi, ring lote hnênah Lal Isua Chanchin ða kan hrilh loh avâng hian an thisen mawh hi kan phur ngam dáwn em ni?

• • •

### THUPÊK ROPUI

† “*Thupêk Ropui*” tih ðawngkam hi kum zabi 17-na hma lamah kha chuan an hmang ngai lo niin an sawi. He ðawngkam hi tu chhèr chhuah nge? *Dutch missionary, Justinian von Welz (1621-1688) niin mi thiamte chuan an ngai. Chumi hnû, kum 200 dáwnah Hudson Taylor-a (1832-1905), China rama missionary hmingthâng tak khân a rawn tilâr ta niin an ngai. Lal Isua thupêk (Matthaia 28:18-20) sawina ðawngkam atân tûn thlengin hman a ni ta a ni.*

## CHIKHURLUI OUTREACH

Lalchhuanpári E/T,  
SHMS, Vaṭhuampui

Kum 2008 aṭang khân Vaṭhuampui Pastor Bial chhûnga thawktute chuan Vaṭhuampui *Pastorate Workers Fellowship* kan din ṭan a. Hemi kum hi SMB lamin Chakma Mission lama beihpui an thlâk ṭan kum a lo ni bawk a. Vaṭhuampui Pastor Bial chhûngah hian Kohhran puitling 5, *Branch Church* leh *Fellowship* 5 a awm. Chutah chuan thawktu mi 40 dâwn kan awm ve a. Thawktuhoten he *Fellowship* kan din aṭanga tun thlengin kan bial chhûnga ringthar an pun zêl nân leh hmasâwn nân kan thawk chho ṭan ta a ni.

Tin, a tir aṭangin thawktute'n kan lâwmmán aṭangin kan intiam theihna ang tâwk pawisa thawh khâwmin, kan bial chhûng Synod-in hma a lâk lohna hmunah thawktu pakhat kan dah a. Hetah hian sikul te dinin kohhran ding ṭantir enkawl pahin zirna lam pawh a hmui tel tho bawk. Chu bâkah he *fellowship* hian *work camp*, *outreach* leh *Meet* adt. a remchân anga nei ṭhinin bial chhûngah hma a la mêk zêl bawk.

*Committee*-in a lo rêl tawh angin sikul chawlh lai hmang ṭangkaiin Chikhurlui-ah *Outreach*

*programme* chu ni 18-21 March, 2014 chhûngin neih a ni a. Chikhurlui khua hi *Home Mission South* huam chhûng Vaṭhuampui Pastor Bial chhûnga awm a ni. He khuaah hian in 75 a awm a, Chakma leh Páng hnam inawmpawlhna a ni. Kan kohhran chhûngkaw khat an awm a, kum 2012 aṭangin Synod-in Evangelist pakhat a dah ṭan ta a. Ringlo in 63 a awm a, Kristian in 12 an awm bawk. Tichuan, ni 18 March 2014 zîng aṭangin mahni thawhna hmun ṭheuh aṭangin Chikhurlui khua chu kan pan

khâwm ta a ni. Bialtu Pastor K. Lalthlamuana leh Pro. Pastor Vanlalfaka Hmar hovin thawktu mi 29 kan kal thei a. Thuhriktu (Speaker) atân Upa Dono Kumar, Evangelist, Saibawh chu hman a ni a. Kan thuhriktu hian Chakma Kristian 2 a rawn hruai tel thei a, kan zavaiin mi 32 kan ni.

Kan *Convener* Pu R. Lalfakzuala, *Headmaster*, Vaṭhuampuiin hneh takin min ho va. Zing leh chawhnu lamah *Home Visit* neiin *Group*-ah kan inṭhen a, zan lamah a khaw chhûng remchâng laiah inkhâwmna neih ṭhin a ni. Inkhâwm apiangin *group* zai leh malzai (solo) ngaihthlâk ziah a ni baw. Zingah leh chawhnu lamah Bethel ṭawngṭai an lo awm reng baw a. Kan thuhriktu hnên aṭangin *sermon* wavi 3 ngaihthlâk a ni.

Thuhriktuin Kristian-naa an inhawn thu leh an ngaihven hle thu te, tûnah a rah hmu thut lo mah ila, he kan thiltih

hian zawi zawiin rah a la chhuah ngei beiseina lian tak a awm thu a sawi a, ṭawngṭaina nêna hmalâk zui zêl a pawimawh tak zet a ni. Eng pawh ni se, Chanchin Ṭha avânga mittui nêna feh chhuakte chuan engtikah emaw chuan hlim taka an buhpâlthe kenga an hawn leh hun a la awm ang tih kan ring tlat baw.

Ka sawi tel leh ṭâlthlâk duh chu, thawktute inpêkna mawlh mai hi a ni. Bial chhûng a zau va, inkal pawhna a harsa êm êm baw. He outreach atâna kan budget siam chu office lam aṭangin tlêm tē chauh kan dâwng thei a. Chuti chung chuan mahni insenso huamin phunnawi hauh lovin kan kal khâwm a. Kan kalna senso te a dik takin kan phuhrûksak thei lo lehngal a, insengsova rawngbâwl-tute an nihzia an tilang hian he hun kan hman hi a ti hlu zualin ka hria. Ei leh in kan tituihnai thei lo chung a tui ti ti

hmêl taka kan ei ho te, a Chanchin Ṭha avânga mi  
 ṭul huna mahni sum leh â nih ngam te, kan nun  
 pai thawh chhuah hreh pawh thlâkhlelh tlâk a  
 hauh lo kan han ni te kha awm lohzia te kan hriat  
 a hmuhnawm lai ber a va thar leh a va ṭul êm!  
 tling êm! Missionary-ten Lalpa ropui ber rawh se.  
 [NI. Lalchhuanpari hi kumin June thla aṭang khân Tlabungah a thawk a ni - Editor]

### **BRAIN TUMOUR (CANCER) A DAM!**

*Rev. G.S. Ropianga  
 i/c Kabuganj Pastor Bial*

Kan Pathian hi engkim ti thei a ni tih hre mah ila, a thil tih a taka a lo lan meuh chuan ‘A va mak êm!’ tih bâk sawi tûr a awm ṭhin lo. Bonarapur veng pakhat Boali-a mi naupang kum 13 mi chu Brain tumour avângin CMC Vellore thlengin hruai a ni a. ‘Thla thum bâk a dam tawh lo vang’ tih thu lungchhiatthlâk tak nêan an lo haw leh a. Beiseina sâng tak nêan *Cancer Hospital*, Silchar-ah *Chemo* vawi hnih chu an la a. A taksain a tlin ngâng loh avângin beidawng takin inah an lo haw leh tawp mai a ni. Thla thum chaw a ei tawh lo va, a kal thei lo va, a ṭawng thei lo bawk.

He naupang P. a. A khawi Biak In ber nge  
 Lakhsman-a hian Vellore tih hriat nâna pathian  
 aṭanga an lo haw hrang hrang hming an  
 kawngah naupang lâwm zawh chuan ‘*aih*’ tih nân  
 zuar hnên aṭangin Isua a taksa la che thei  
 kraws a hmu fuh a. Duh chhunte a chettîr a. Isua  
 taka hûmin a thlah leh hming an lam meuh  
 phal tawh lo va. A nau tân erawh chuan ‘*aw*’ tih nân  
 pakhat leh ama tân a bu nghat a ni. Tichuan,  
 pakhat, a nu a leitîr a. ‘*miten engtin pawhin min  
 sawi mah se Isua hnên pan  
 tawp mai hi a kawng awm  
 chhun a nih hi*’ tiin



Kristianah an chhûngin an rawn inpe a, baptisma an chang ta a ni.

A baptisma chan ni chuan a ðu chhuak peih miah lo va. Mahse, kan han zai ho va, ðawngtâinate kan neih meuh chuan a ðu ngil zawt mai a ni. A nu pawhin mumang lam aţangin, nulain a keah vuana kawr vâr hà-in a lú-ah a kut nghata a ðawngtâi a lo hmu lâwk a. Hun kan han hmang chu a mumanga a nula hmuh ngei mai hmêl a lo lang tel bawk nê, dam ngei tûra rinna nghet tak amahah a awm a ni. Chuta chin chu zan tin *phone* hmangin kan ðawngtâi ziah a. Zîng lamah a remchan chuan kan ðawngtâi ðhin bawk a. Hmun hrang hranga kohhran leh ðhian ðha te, *Facebook* ðhianta leh an chanchin hria apiangin kan ðawngtâipui ðheuh a nih kha. Kâr hnih a liam meuh chuan a hmasâwnna a lang ta bawk a. Tin, anmahniin Bible chhiar leh ðawngtâi

an tih reng bawk avângin *phone*-a ðawngtâi chu kan bansan titih ta a ni. An chhûngkua pawhin Inrinni apiangin chaw nghei ðawngtâi an chhunzawm zêl bawk.

Tûnah chuan thla hnih a liam ta a. Chaw a ei leh thei tawh a. Thumal tawi tê tê chu a sawi leh thei tawh a, a kal leh thei tawh bawk! An chhûngkuain Borokhal *Crusade*-ah lo kalin an chanchin an han sawi chu mipui a vèl nasa hle a ni. An nufaa Isua fak nâna an tih ve theih chhun, '*Halleluia, Amen!*' ti-a an han âu dûnte chu lâwm avânga ðah loh rual a ni lo. Tûnah hian a bân ding lam a la che thei rih lo. A duh ber chu Isua faka zai leh Isua tâna a bân phar ve theih hi a ni. I ðawngtâi chhunzawm zêl ang u.

An ina baptisma hun kan hman dâwnin thâwm dim tûrin min ti a. Mahse, Isua hminga baptisma bêngchhéng hi damdawi a lo ni si! Nazaret Isua kal tlangna

béngchhéng i siam ðhin ang u.

Damdawia an beidawn tawh hnuah a ná tuar a ziaawm phah beiseiin Cancer Hospital, Silchar-ah kâr hnih vêl an awm a. An awm chhûngin vauna kawng hrang hrangin an tâwk

a. Chuta a nau P. Roshan-a kum 10 mi thu sawi chu: “*Ka nu, lehkhabu keu la, Isua chanchin chhiarsak ve rawh. Isua hi an la hre ve lo a nih hî*” tiin. Vântlâng ensan tih vêlin a tibuai phâk lo. Lalpa chu fakin awm rawh se!

Anawthu

Zan khat chu pa pakhat hi a pindana a muthilh laiin a mutna pindan chu a lo éng ta phût mai a, a hnênah Pathian a rawn inlâr a. Lalpa chuan chu pa chu a tâna hna thawk tùra hrilhin a in hma lama lungpui lian tak mai chu a kawhmmuh a. Lalpa chuan chu lungpui chu a theih tâwpa nem (nam) ðhin tùrin a hrilh a.

Chu pa chuan Lalpa hrilh ang chuan ni tinin chu lungpui chu a nem ðhin a. Chutiang chuan kum eng emaw zât a ti a. Zânah chau takin a mu a, a hun leh tha a séng thlawn hle ðhinin a inhria a.

Chutia a lunghnûr deuh veleh chuan hmêlmapa, Setana a lo lang vâ a. “*En teh, i nem rei tâwk tawh e. Mahse, lungpui hi chêt pawh a che eih si lo. Eng vângin nge hetiang ringawt atân i inhman zawh ang ni? A hmingin ti ve mai mai la, a tâwk. I Lalpa hian thil tih theih loh tawp a ni a tihîr che hi,*” tiin a rawn thlêm ta a.

Chu rawtna chu chu pa chuan ðha hlein a hria a. Mahse, a rilru hahna leh a buainate chu a Lalpa hnêna thlen hmasak phawt a duh a, “*Lalpa, i thu awihin i tân hei chen hi ka theihna zawng zawngin ka bei a. Mahse, inchi khat pawhin ka la tiche si lo. Eng vângin nge min hlawhchhamtîr mai le?*” tiin a ðawngtâi ta a.

Lalpa chuan zaidam takin, “*Ka ðhian, ka rawng min bawlsak tùrin ka ti che a, nanging i lo pawm a. Lung nem tùrin ka hrilh che a, thu awih takin i zâwm bawk a. Mahse, eng lai mahin he lungpui hi nem sawn tùrin ka beisei ngai hauh lo che asin. I tih tùr chu nem mai kha a ni e. I chakna zawng zawng hmang zovin, hlawhchhamah i inngai a. Mahse, a dik meuh em? Han inen Chiang teh. I bán tha chak tâkzia leh tihrawl ðat tâkzia te, i hnungzâng te, i kut leh ke te an lo chak tâkzia leh an invuah ngheh tâkzia te hi. Lung lian tak mai nem sawn i tum avânga i pianphung leh hriselnate a lo danglamzia te hi en teh. Lung hi i la nem che reng reng lo ngei mai. Mahse i tih tùr, lung nem mai kha, min ring tâwka, thu awih taka i zâwm avâng hian rinna kawngah i lo puitling ta hle bawk a ni. Tûnah chuan keiman lung hi ka nem sawn mai dâwn a ni,*” tiin a thinlungah thu a rawn sawi ta a.

Ringthar neih loh avâng te, ringtharten beisei an phâk loh avâng te leh thil dang tam taka hlawhchham nia kan inhriat avâng te hian beidawn a awl ðhin. Mahse, Lalpan Nangmah ngei kha tih tùr pawimawh tak ti tùrin a ko che a. I tih tùr chu lung nem kha a ni. Lalpan a duh hunah a nem sawn mai ang.

**MIZO PASALṬHA HUAISEN, KRISTA KRAWS SIPAITE HI!**

- Paul C. Lalchungnunga  
Zarkawt Valley

Ramthar chanchinbu hi ka la ve a, ngaihnaawm ka tiin, kan Mizo *Missionary-te* hi ka ngaisâng tak zet a ni. Khawvêla Pasalṭha ropui leh huaisen ber, hlawh nei chhe ber bawk si - rawngbâwltute hi an va ngaihsanawm tak êm! Khawvêl sum leh pai ropuina han ûm ve thei ziazâng dinhmunah ding ve mang si lo hian Krista tân hah êm êma an thawhna chanchin, Ramthar chanchinbua lo chhiar te hi a va manhlâ tak êm! ‘*An thawk ṭha viau e*’ tih rual rualin, an lainataawm angreng phian lawi bawk si. Tin khawvêl thil tak pawhin an awmna *field*/rama hnam khawsak dân te leh a ram chanchin an rawn ziah lante hi a ngaihnaawmin a bengvarthlâk danglam ve reng reng mai.

Mihring ve mai an nih avâng hian lo che pháwsáwlh / duhdah tâwkte chu an awm ve lo thei lo va, hriatthiam an ngai tak zet a ni. An dinhmunah hian ding ve ila eng nge kan ân bîk ang, tih hi ngaihtuah fo hi a ṭul tak zetin ka hria. Peterate meuh pawhin khandaih lékin mi béng a sahthlâk mai kha! Mihring rilru chhuah châng chu a awm lo thei bîk lo. Hemi avâng erawh hi chuan an inthlahdah ngawt tùr tihna erawh a ni bîk hauh lo vang. Bible ṭanchhana mar páta ṭan

khawh tùr an ni reng zâwk awm e. Tin, tunlai hian *missionary-a* inpe hi an pung mek niin a lang a, a làwmawm tak zet mai. Lalpa tâna tha kan thawh hnem chuan Pathian hian nasa takin Mizote hi malsàwmnain a vur ngei ngei ang tih ka ring nghet tlat a ni. India ramah hian *missionary* tir chhuak hnem ber *State* kan ni ngeiin ka ring. Kristiannaah Mizoram é pha tùr hi khawi *State* mah an awm lo.

A tlângpuia ka hmuh dân chuan ‘*chhûngkaw awm thei tak aṭang ai hian*

a rethei leh harsa zâwk hi an lût tam em áw' ka ti a. Mi hausa/awmthei, vua leh vângte kal tamna tûr zâwk a nih hmél tehreng nên hianin. Mi awmthei zâwkte an harh chhuah a ÷ul tak zetin ka hria..

Hah leh thih hial pawh huama eng hnam mâwl emaw an han awm chilh tawp a, an va awm chhan ang ngeia, rah duhawm tak an rawn chhuah ÷hin te hi a ngaihthlâk a nuamin inçhông lum a÷ang pawhin hlim taka kan lo nuihpui ve bâwk bâwk ÷hin te hi a va han hlu tak êm! **“Tap chungin Lo nei mah sela, nui chung a thlai tharte an phur haw leh ÷hinte hi - a thâwm hriat a va nuamin a va duhawm tak êm!”**

Ngaihnaawm ti takin chhiar ÷hin mah ila kan lainat bawk si a....Rawtna tlêm ka'n siam ang e:

**[1]** Vengtinah hian *Missionary*-te ÷anpuina tûr, thawhlâwm thlâkna tûr báwm hi Biak In chhôngah, mahni phal zât ang zêla súm thlâk khâwm maina tûrin húng ila.

**[2]** Tin, kan thawmhaw hlu leh thil dangte an *Mission Field*-a an hman ÷angkai tûr chi vawm khâwmna hmun siam ta ila, a ÷ha viau mai thei bawk.

**[3]** Mizote hi India ramah chuan hnam dang hian min ngaisangin min ngaina bîk riau niin a lang. Hei tak hi hman ÷angkai dân thiam chuan *missionary* hna hian nasa takin hma a sâwn thei ngei ngei ang.

**[4]** *Missionary* hnathawk, mahni hma hlen chhuak zo dáwn lo emaw tlu dáwna inhria chuan an mualpho hmáin bansan mai ngamna rilru pu sela, kan ÷hat tlân phah zâwk ngeiin a rinawm.

A tawp ber atân chuan Kristian zawng zawng hi kan awmna hmunah ÷heuh *Missionary* kan ni thei vek tih hi i hre reng teh ang u. Kan hma lâk dân erawh a dang a ni mai. Kan zinna, hnathawhna hmun leh khawi laiah pawh *Missionary* hna hi kan thawk pah thei vek a ni.

**LALPA TÂNA PASALṬHA***Obeda Lalbiakmawia, Sarihajan*

Lalpa tâna ṭhahnemngai, mi ṭhahnem tak Zoram chhûngah an awm laiin, vawiina mahni in lûm pawh thlahleh hlei thei lova ram dang, hmel dang zînga rawngbâwltu, Lalpa tâna pasalṭha ni tura chhuak, *missionary*-te chungchâng i han sawi ho teh ang u.

**Lalpa tâna râl dó:**

Khawvêla râl dótute chuan râlthuam ṭha tak tak, silai mu-in taksa a khawih pawh loh nân silai mu kah tlang theih loh (*bullet proof*)-in an inthuam a. Anmahni pawh pa lian leh chak tak tak, hmêl en pawha zuamawm lo tak leh inthazo tak takte an ni. Lalpa tâna râl dóva thim lal ram latute ve thung chu han en mai pawha inthazo lo tih hriat reng reng, han inhnialpui leh inhauhpuh hrep zuamawm tak te, khawvêl lama ṭantu ṭha nei lo te leh hnung dâwltu nei êm êm lo te an ni.

Lalpa tâna an harsatna tawh kan hre ve tawh rêng em? Hmuh theih loh râl chu an dó ngei a, inrâl rin dan thiam a hâr ngei ang le! Lalpa tâna ram laa, thim lal dó an

nihnaah hmêlmapa chuan a dawh mai mai si lo va le. Indona chu an thawhna hmun an rah luh rual rualin an ṭan ve nghal a. *Bullet proof* an neih ve loh avângin silai mu chuan a verh ta nghal siah siah mai a. Chawlh zai rêng rêl lova mu thara a kah reng avâng leh inthazo leh chak tak an nih loh avângin taksa leh thlarau lamah an dà tual tual a. Mahse Lalpa tâna pasalṭha chhuak chuan inhnehtîr mai duh lovin an chaknate an siam thar ṭhin a. Chutiang chuan chak lo tak chung pawhin hmêlmate chu an hmachhawn ṭhin. Chakna leh thiamna hmanga dó lêta hneh chi a ni si lo va. Harsatna leh manganna kârah pawh rilru na tak leh chak lo tak chung pawhin thim

ram, ênga siam turin an la bei hrâm hrâm zêl a ni.

Hmêlmapa chuan an chak lohna lai a hre Chiang êm êm a, a kah thelh ngai lo. Phûr taka Lalpa tâna chhuaka thawk tura inpe mi tha tam tak a rawn thawn kir chhawk a. Hmêlmapa chuan a chak that êm avângin tisa leh thlarauvah hneh takin a nuai hlâwm a. Anniho chuan bân-san leh hawisan zai rêng rêl lovin Lalpa ram zauh tûrin hma lam panin an la kal hrâm hrâm zêl a. Lalpa tâna Zoram nuam tak aţanga pên chhuakte tân nasa lehzualin i ţawngţaipui theuh ang u. Chuti lo chuan, bân zai an rawn rêl dah ang e.

**I inen fiah teh ang u:**

Lalpa tâna lu chhum bân chhum huama chhuak Lalpa pasalţhate, vânah in lâwmman a va tam dawn êm! Lalpa ram lâk leh Lalpa tâna thawh tam harsatzia chu nângni aia hre Chiangtu tu dang nge awm chuang? Lalpa tân in

chakna siam tharin in puan ven in sawi chhing thin a. Lalpa malsâwm-nain ramte in la zêl a, thlarau bo tam tak in rawn hruai a.

Mahse, beitu a chak êm avângin kan lo zal ta deuh em ni? *'Ka luh tirh chuan', 'hmânah chuan', 'ka luh tirh lai nên chuan danglam tawh tak ka ni'*, ti-tein kan sawi fo thin. Lal Isua aiawh leh a hnung zuitu kan nihna ang ngeiin Lal Isua kan ang telh telh nge kan ang lo ta tial tial zâwk le? Lal Isua tân engkim huama kal khân nat kan hlau ta viau em? Mi sawisel kan hlauh avângin thil tha tih tûr kan hriat reng pawh kan ti ngam ta lo em ni? Kan hahin kan chau hma ta lua em ni? Rawngbâwlna tak tak thawk si lo hian a behbâwmah kan lo kual kan lo kual a ni lo maw? Nunna hial chân ngama chhuak hian titi lêng vêlah ka lo na lutuk thin em? Lalpa tâna tling lo leh tha tawh lo tih inhre Chiang êm êm chung a chhuakte hian

rawngbâwlna hmunah mi dangin kan tlin lohna leh dik lohna an sawi hian kan na viau ðhin em? Kan ðhianteh leh kan chhûngte pawh kal ve lo mah se, 'kei ka kal ang' tia pên chhuak tawhte hian rawngbâwlna hmunah thawhpuite enin, 'anni pawhin an ti chuang lo' tiin kan lo inthiam ðhin em? Kan zui, 'Lal Isuan engtin nge min tih ang' tih aiin 'kan rawngbâwlpuiten engtin nge min tih ang' tih kan ngai pawimawh zâwk ðhin em?

Hna dang kalsana retheih huama kalte khân rethei bîk, neih loh bîk kan hlau ta lutuk em? A tîra Lalpa tâna eng pawh huam khân tûnah kan la huam zêl em? Chhûngkua, fa leh khawvêl thilte hian rawngbâwlna an dâl ta lutuk a ni lo maw?

Kan thawk rei tial tiala kan lo phunchiarin a hmaa kan tih duh loh kan lo ti kan lo ti ve tawh em le? Kan inhriat miah loh hian hnawksak kan lo ni reng em? Pathian thu

aiin thil dangah kan tui tawh zâwk em le? Hetiang mi hi kan ni tih inhre hauh lo tûr hian hmêlmapa hian min lo bum reng a ni lo maw?

**Ṭan i la thar teh ang u:**

Kan chakna, Bible chhiar leh ṭawngṭai uar ila, i insang mar leh teh ang u khai! Hmêlmapain kan panna laiah hlir min rawn bei ðhin mah se min beitu beisei loh dânin i chhâng lêt zêl teh ang u. Lalpa tân kan inpe ta sa sa, kan chhuak ta rau rau, lu chhum bân chhum huamin, engkim chàn huamin, mawi loh leh mi dang mitmei vêng lovin râl i'n do leh teh ang u. Kan Pathian hian min kalsan ngai si lo va. Kan inpêk leh thawh dan azirin min puih a inpeih reng si a. Lalpa tâna pasalṭha chhuakte hian kan thawh rah kan sêng hun a la awm ngei dâwn si a, Lalpa vohbîk kan nih miao avângin.

**Pasalṭha la ni zêl turte:**

Pasalṭha ni tûra inbuatsaih mêk tam tak an awm a, dîl tûra inpeih

eng emaw zat an awm  
bawk. A hna a ropui, a  
ṭha tih avānga fate thawh  
ve a tâna duhpui êm êm  
tam tak an awm bawk a.

Kan insawiṭhahih a ni lo  
va, mi nazawng tâna tih  
chi leh kal ve ngawt  
ngamna chi a ni lo tih kan  
hre âwm e. Phûr thût  
thila tih chi a ni ngai lo  
va, pianthar thut vānga  
kal ve ngawt chi lah a ni  
lo. Hna awl tih avānga dil  
chi pawh a ni hauh lo.  
Fate nâwra tihtîr chi lah

a ni lo, hna dang ang a  
ni ve si lo va.

Mi tam takin zo lovin  
mualpho takin an rawn  
bânsân fo tâk hi!  
Rawngbâwlna leh Isua  
hmêl timawi lotu mai kan  
ni dah ang e.  
Amaherawhchu, Lalpa mi  
thlan kan nih erawh  
chuan muang hauh lovin  
rawn zuang lût ang che.  
Ram lâk tur a tam si a,  
muang hman kan ni lo,  
châwl hman kan ni lo. A  
ni têlin an liam zêl si a.

[Tv. Obeda hi missionary fapa niin Ramthar Field-a chêng a ni e. - Ed]

✠ *Tûn chhuana Kristiante hi tûn chhuan vêka awm vete  
thlarau chung a mawhpûrtu kan ni*

- **Keith Green-a**

✠ *Pathian hi missionary hmasa ber a ni. Genesis 3:8-  
ah kan hmu a - mi sual pahnih, amah helsantute zawnga,  
amah nêna inpâwl tlâng leh tûra hruai kîr leh tûrin a  
kal chhuak a ni*

- **Eddy Ho-a**

✠ *Missionary rilru hi finvârna emaw Pathian thua  
inhniálna emaw aṭanga lo zî chhuak ni lovin, hmangaihna  
aṭanga lo irh chhuak a ni zâwk ṭhin.*

- **Roland Allen-a**

✠ *Hindu-hote chu, “Isua zirtîrnate hi zah taka in  
zir loh chuan in nun a kim thei ngai lo vang,” tiin  
ka hrilh dâwn a ni*

- **Mahatma Gandhi-a**



**HUN PUMA RAWNGBAWL TÛRA KOHNA**

1. Hming : H.C. Lalmuansangi
2. Hna hming : Staff Nurse
3. Thawhna hmun : Noxatilla

*Missionary* hna thawk tùr hian a hranpaa kohna êm êm dâwng ka ni lo va. Amaherawhchu, ka naupan têt aṭangin *missionary* nih chu ka tum lian tak a ni thung. Ka nu hian ka naupan têt aṭangin, “*Lehkha kan zirtîr nachhan che u hi khawvêl ropuina leh hausakna lama intlansiaknaah ni lovin, Pathian rawng zau zâwka in bâwl theihna tùrin Pathian hnênah kan hlan tawh che u a. In zir duh leh zir ula, in zir duh loh chuan in thu thu a ni tawh. Pathian rawng zau zâwka bâwl tùr pawhin thiamna eng emaw tál kan tunlai khawvêlah chuan neih a ngai tawh a ni,*” tiin min fuih ṭhin a ni.

Kum 2005 thla tàwp lamah khan *Burrows Memorial Christian Hospital*, Alipur-ah Nurse training tùrin Pathian zârah ka tling ve hlauh va. Hetih lai hi *Nepali Preaching Station*, Bâwngkâwnah naupang lama zirtirtua ka ṭan lai a ni a, ‘*missionary nurse training* tùrin a kal dâwn’ tiin ka pualin thlahna hun an buatsaih nghe nghe a ni.

Kan *training* zawh hnûah *Duncun Hospital*, Bihar-ah thla 4 chhúng ka zuk thawk leh a.

Chuta ṭang chuan bângin Aizawlah *Bethesda Hospital & Research Centre* Bawngkawn South-ah ka thawh chhonzawm leh a. Kum 2 hnûah Kolkata-ah *Post Basic B.Sc Nursing* tih leh tumin ka *exam* leh a, mahse ka tling ta lo. Mizoramah MPSC-in *Staff Nurse* nghet tùr an lák dâwn vângin *exam* tùrin ka inbuatsiah leh ta a. Mahse Sorkar lamah eng emaw harsatna avângin *exam* pawh chu ṭhulh a ni leh ta zêl a.

Vànglaini chanchinbua *Synod Mission Board*-in

missionary a mamawh tih  
 thu an rawn chhuah khân  
 Pathian rawngbâwl  
 kawnga ke pên vena hun  
 remchâng a nih beiseiin  
 dilnate ka theh lút ve a.  
 ‘Ka tlin pawhin Pathian thu’,  
 ‘tlin loh pawhin a thû thû’  
 tiin ka dil ve ta a. A  
 rawngbâwl tùrin Pathian  
 chuan min lo thlang ve ta  
 a. Keima mihringa  
 tumna, thiamna sâng  
 zâwk neih te leh sorkar  
 hnathawh lam te chu  
 Pathianin min  
 paihthlâksak vek a ni a.  
 Chanchin Ṭha hril hna  
 thawk tùrin min ko zâwk

a ni tih hi ka hrechhuak  
 Chiang ta êm êm a ni.  
 Mite angin finna leh  
 thiamna sâng tak nei lo  
 mah ila, Pathian hian  
 tûn huna a rawngbâwl  
 hna thawk tùra min  
 tîrhna Noxatilla, Cachar  
 Tlángraham hian  
 theihpatâwpa Pathian  
 rawngbâwl tùra ka ke pên  
 chhuah hi ka châkin ka  
 phur êm êm a ni. Lâwm  
 takin he rawngbâwl hna  
 hi Pathian ropui nán ka  
 phâk ang tâwka thawk  
 tùrin ka inpe ta a ni.  
 Lalpa chu fakín awm  
 rawh se.



### KUM THAR-ah

- *I thinlung zawng zawngin LALPA ring la,  
 Nangma hriatnaah innghat suh;  
 I kawng zawng zawngah amah hre reng la,  
 I kawngte chu a kawhhmuh zêl ang che. – Thufingte 3:5,6*
- *Chutichuan, “Lalpan rem a tih chuan kan dam ang a, chu mi  
 kha mi kan ti ang,” in ti tur hi a ni. - Jakoba 4:15*
- *I thil chin ṭha lote chu do la, i thenawmte chu rem la, Kum Thar  
 tin hian i hmasâwnzia hmu rawh se. – Benjamin Franklin*
- *Ka thutiam pakhatna: Pathian tân ka nung ang. Pahnihna: Ti ve  
 dang an awm loh pawhin, Pathian tân ka nung zêl ang. - Jonathan Edwards*
- *Ka ke véng la, thlir hlat ka dîl lo ve,  
 Tlém tê a tâwk - pên khat pawh ni mah se. - KHB No. 155*

## RAMTHAR FEH

## A.

1. Field hming : Home Mission South
2. Khua : Parva I
3. Tlawh hun chhûng : Nov 26 – Dec 2, 2013
4. Tlawhtu : Thingsulthliah Ramthar Committee
5. Kal zât : Mipa-19; Hmeichhia-2
6. Tlawh chhan : Hnathawh
7. Hnathawh : Class room *extend*-na tur lei laih
8. Senso : ₹ 87,000

**9. Lâwmawm lam:** Kan hnathawh tûra an ruahman chu ni hnih chhûngin kan zo ta mai a. Ni hnih dangah chuan sikul kawt ko la chhah bûr chu kan laih zawm a. Ni khat dang chu thawk leh ila kan zawh theih a beiseiawm. Thawktute an lâwm hle a. Keini pawh tu mah intipalh leh damlo awm lovin hun kan hmang zo thei hi Pathian khawngaihna kan dawn a nih avângin kan lâwm tak zet a ni. Parva I-ah hian Biak In sak pum tawh tuhverh leh kawngkhar la vuah loh a nih avânga luah theih loh chu Krismas-a luah theih tûrin tukverh dârthlalang kan keng phei a. A man kan dawng kim duh lo va. Krismas atân ₹ 2,000 kan pe a, annin Thuthlung Thar Bible, tê fel tak min pe ve thung.

Thawktu hi pasarh an awm a. Headmaster taimâkna leh inpêkna a fakawm a, zirtirtu dangte thuawihna leh taimâkna a duhawm hle baw. Hna kan thawk ho tuan chhuak a. Neitu rilru an pu hle mai. Malaria pai reng, nat hlauhawm tak, damdawi in aţanga chhuak hlim pawh an inthlahdah chuang lo. Ahmei apaa ţahnemngai taka lei an lai bawrh bawrh mai chu hmuhnawm tak a ni.

**10. Thu belh:** Sumo pahnihin kan kal a, zân dâr 7:00-ah Lawngtlai kan thleng a. Pu Liantluangate chhûngkuain zanriah tui tak min lo buatsaihsak a, an chungah kan lâwm hle. A tûk zân dâr 7:30-ah Parva I chu thlengin thawktuten zanriah min lo buatsaihsak chu puar takin kan ei a, kan thlenna tûra an buatsaihah chuan kan riak ta a ni.

Zîng dâr 6:00 aţanga tlai lam dâr 3 thleng lei laih hna kan thawk ţhin. Zân lamah Headmaster quarters-ah inkhâwmna hun hmangin thawktute testimony kan ngaithla a. Inrinni zânah sikulah Kristian naupangte leh an nu leh pate nèn kan inkhâwm a, Upa ZD Zirsangkhuman Pathian thuchah a sawi a ni.

A tûk Pathianni chawhmaah Parva II Kohhranin kan pualin inkhâwmna min siamsak a, Biak In khatin naupangte nêen kan inkhâwm ho a ni. Mizo ãawnga Krismas hla saa naupang leh puitling lâw hmuh chu a nuamin rilru a khawih khawp mai. Pu C. Lalngaihzuala'n thuchah a sawi a, Intermediate naupangin hla an sa bawk a. Inkhâwm banah thingpui ruai kil ho nghal a ni.

Parva I piah chhim lam Km. 4 vêla hlaa Sumasori-ah Evangelist pakhat thawhna hmun chu kan va tlawh a. Ringthar hovin thingpui leh chhang min lo buatsaihsak a, kan tlai kher mai. An Biak In hmun turte kan fan hnuin Parva I lam panin kan haw leh ta a. Zânah Upa Laltluanga'n thuchah a sawi a, inkhâwm banah dâr 10 thleng inpâwlhona kan nei zui lehngal a, kan hlim hle. A tûk zîngah inthlahlel leh inngai tak chungin Thingsulthliah lam panin kan chhuahsan ta a ni.

Mizoram chhim tâwpa awm an ni bawk a, tlawhtu an nei ngai meuh lo va, a tlawhtu pahnihna kan ni nghe nghe. A kawng a chhe hle a, an châk lâkna kal man senso a hautak hle. Sikul lama zirtûr leh a remchan dan ang anga kampên neih chu an hmalâkna a ni a, ãawngtaipui an ngai hle.

*'Âw tûnah hian i kal ang u,*

*Hmun khawhar lam chu i pan zêl ang'*

*C. Lalngaihzuala*

*Thingsulthliah RT Comt. Member*

**AW.**

- 1. Field hming** : Home Mission South
- 2. Khua/Mission Center** : Tlabung Chawnpui
- 3. Tlawh hun** : February 15-27, 2014
- 4. Tlawhtu** : Chawlhmun Kohhran
- 5. Kal zât** : Mipa – 7, Hmeichhia – 3
- 6. Tlawh chhan** : Hnathawh

**7. Hnathawh:** Mission Compound chhûngah thawktu chênna in ft. 40'x18' a chhâwngin kan sa a, varanda ft. 5-a zauvin a tluana siam belh a ni. Chênna in an la indaih lo hle. Ram pâwn leh ram chhûng hi rualkhai deuh zâwka enkawla, kal kân neih loh a ãa hle. Kan zawh fel hman lohte an lo thawh chhonzawm nân ₹ 4,000 kan hnutchhiah a, Chawnpui, Tlabung Kohhran tân ₹ 1,500 leh Bethel Kohhran tân ₹ 1,000 kan pe bawk.

8. Senso zat : ₹ 49,765

9. **Lâwmawm lam:** An Pastor Vanlalţana te, Headmistress Rosie Rohlupui te, thawktu zawng zawng te inpêkna a ropuiin an entawn lâk, an thawhona a ţha hlein kan hria. Kan thawh chhûngin tu mahin hunawl awm lovin min pui reng a, an bula awm a nuamin kan hlim hle. A remchan angin Kohhran inkhâwmah thu hrilna hun min pe a, kan lâwm hle. An hrehawm kan hlauh aia nasain kan chàm chhûng tê mai pawh kan hrehawm min hlauhpuia, an fakawm hle.

*Upa Dengchhûnga, Leader  
Chawhmun Kohhran, Aizawl*

**B.**

1. **Field hming** : Home Mission South

2. **Mission Center** : Zawlpui

3. **Tlawh hun** : February 21-23, 2014

4. **Tlawhtu** : Dinthar Vengthlang Kohhran RT leh Hmeichhe Comtt.

5. **Kal zat** : Mipa – 10, Hmeichhia – 13

6. **Tlawh chhan** : Pi Lalrampani E/T, rawngbâwlina hmuhpuia.

7. **Hnathawh** : Bial chhûng Kohhran 4-a rawngbâwlina neih.

8. **Senso zat** : ₹ 67,535

9. **Lâwmawm lam:** Bialtu Pastor C. Lalruatkima leh thawktu dangte'n kan cham chhûnga kan mamawh leh rawngbâwlina kan neihah min ţawiawm ţha a, kan lâwm hle.

10. **Lâwmawm lo lam:** Bolia khuaa Kohhran sikul-a thawk, Zirtirtu chu chawmtu an awm loh avânga naupangte leh an nu leh pate pâwl danga an pakai ţhin chu pawh kan ti hle.

11. **Thu belh:** Naute pahnih kum khat leh ni nga mi chu a nu a boral avângin, hmangaihna ina dah turin kan hawnpuia, hmangaihna inah kan dah nghal. Zawlpui Pastor Bial hian Gospel Camping an mamawhin ţul an ti hlea, sum an neih loh avângin Camp hi an nei thei lova, ţawngţaipuia an ngai hle, an tân i ţawngţai ţhin ang u.

*C. Lalsánglura  
Dinthar Vengthlang Kohhran RT Committee Ziaktu*

**B.**

1. **Field hming** : Karbi Anglong
2. **Khua** : Rongmongve Kohhran, Chokihola  
Pastor Bial
3. **Thawh hun chhông** : Ni 26 Feb., 2014 – 05 Mar., 2014
4. **Tlawhtu** : Presbyterian Kohhran, Khatla South  
Ramthar Committee.
5. **Kal zât** : Mipa – 6 Hmeichhia – 4
6. **Tlawh chhan** : Bial Inkhâwmpui ei râwngbawlsak
8. **Senso zât** : ₹ 43,000
9. **Report ÷ul dang** : Rongmongve hmun hi luipui kama awm  
niin a hmunhma a rem hle a. Ramthar Field-a Kohhran hmun  
pawimawh tak la ni mai tûra thawktute pawhina an beisei a ni.  
Kristian an nih avânga an chhôngten an hnawhchhuahte tlan  
khâwmna a ni a. 3<sup>rd</sup> I.R. Police-in ram *bighas* 16 an leisak a,  
**‘Kristian colony’** an vuah a. Kristian an nih avânga an chhôngten  
an hnawhchhuah chhôngkaw 11 an awm mêk a ni. 3<sup>rd</sup> I.R. Police-  
te hi an ÷ang kai hle mai a, Biak In sak nân leh ringtharte ÷anpui  
nân Cheng Nuai 58 chuang an seng tawh a, Missionary-te leh  
ringtharte tân an thlamuanpuiawm hle a; an tân Vântirhkoh an  
ni ringawt a ni. ÷awng ÷aipui erawh an ngai hle a ni.

*Lalramhluni Hnamte*

*Khatla South Kohhran Ramthar Committee Ziaktu*

**CH.**

1. **Field hming** : Home Mission South
2. **Centre hming** : Belpai
3. **Tlawh hun chhông** : Ni 04 - 10 March, 2014
4. **Tlawhtu** : Kulikawn Kohhran Ramthar Comt.-2
5. **Kal zat** : Mipa - 19; Hmeichhia - 3
6. **Tlawh chhan** : Biak In sak.
7. **Senso zat** : ₹ 1,85,188
8. **Lâwmawm lam** : Work Camp chhông zawnga damna leh  
hriselna min petu Pathian chungah lâwm thu kan sawi a. Work  
Camp hlawhtlin nâna sum leh pai thawhtute leh a thawktute  
inpêkna a ropui kan ti a, kan lâwm tak zet a ni.
9. **Report ÷ul dang**: Belpai Kohhran hi Tlabung Chawnpui Pastor  
Bial chhônga awm a ni a. Kohhran member 197 an awm a, Helai  
hmuna thawk tûr hian March ni 15 khân kan Kohhran mi 2 -

Tv. Malsawmdawngkima leh Tv. Vanlalthumhima te lâk an ni a, a lâwmawm kan ti hle a ni. Thawktu leh Kohhran tân i ƣawngƣai zêl ang u. Kan Biak In sak hi a dung ft. 24 leh a vâng ft. 18-a lian niin sikul atâna hman theih tûra ruahman a ni bawk.

*H. Zoliana*

*Kulikawn Presbyterian Kohhran Ramthar Committee Ziaktu D.*

1. **Field hming** : Tripura Mission Field
2. **Mission Centre** : Bethlehem English School, Noagang
3. **Tlawh hun chung** : Ni 10 –15 March, 2014
4. **Tlawhtu** : Leitan Ramthar Committee
5. **Kal zât** : Mipa - 10 , Hmeichhia – 2
6. **Tlawh chhan** : Hnathawh
7. **Hnathawh** : Sikul ƣhutthleng leh Dawhkan siam
8. **Senso** : ₹ 48,470
9. **Lâwmna lam:** Zing dâr 6 – 9 thleng kan thawk ƣhin a, kan ƣang tlâng ƣha a, a lâwmawm hle. Tu mah inhliam awm lovin hlim tlâng tak leh nuam ti taka kan thawk ƣhin chu lâwmawm tak a ni.
10. **Lâwmawm lo lam:** Tui a harsá, kan inchawi chawp a, a buaithlâk khawp mai. Thawktute'n min ho ƣha hman lo va, thawh dân thiam a har deuh. ƣha tak chuan kan zo thei e.
11. **Thubelh:** Bialtu Pastor a inpe hle a, a hun neih remchan apiangin min ho va, a nuam hle. Thawktu dâng an hnaah an ƣul deuh va, duh angin kan inpâwlho hman lo va, keini lam kan hna duhthawh nê, hun thawl deuh neia inpâwl khâwm a châkawm hle. Kan kal chhan hna tluang takin kan thawk tluan thei a, kan lâwm hle.

*F. Lalsanghlunchhunga*

*Leitan Kohhran RT Committee Ziaktu*

**E.**

1. **Field hming** : Home Mission North
2. **Mission center** : Marpara
3. **Tlawh hun chung** : Ni 19-23 March, 2014
4. **Tlawhtu** : Dârlawn Venghlun Kohhran Ramthar Committee
5. **Kal zât** : Mipa-15; Hmeichhia-7
6. **Tlawh chhan** : Chakma Convention.
7. **Hnathawh** : Ei rawngbâwl.
8. **Senso** : ₹ 30,330

**9. Lâwmawm:** Bialtu Pastor leh thawktuten min lo dawnswan dân leh min thlen dânah lâwmawm kan ti hle a. Kan thawh hona a thain, kan ei siam naah pawh min thawiamw tha hle a ni. Tin, fehchhuakte pawh kan inpawhin thawhhona a tha hle a, boruak a nuam a. Kan lâwm hle a ni.

**10. Thu belh:** Helai hmuna cheng tam berte hi Chakma nnam an ni a, a tam zâwk hian Buddhist sakhua an vuan a ni. Kristian tlêm tê an awm ve bawk. Thawktute leh an mahni hnam ho tân hian i thawnghai ang u.

*R. Ramhlimawma*

*Dârlawn Venghlun Kohhran Ramthar Committee Ziaktu*

**F**

- 1. Field hming** : Home Mission South
- 2. Khua** : Lungsen Kohhran
- 3. Tlawh hun chhông** : Ni 11-14, April, 2014
- 4. Tlawhtu** : New Serchhip Kohhran
- 5. Kal zât** : Mipa – 5, Hmeichhia - 3
- 6. Hnathawh** : Naupang Sande Sikul hmun tûr laih
- 7. Senso zât** : ₹ 65,660
- 8. Lâwmawm lam** : Pathian kaihhrainain tuang takin tlai dâr 4:00 vêlah Lungsen kan thlenga. Lungsen Pastor leh Kohhran Committee-te'n min lo hmuak a, zanriah tuihnai takin min lo buatsaihsak bawk a, kan lâwm hle. Kan châm chhông zawng Pastor chênna inah kan khawsa a, inpawh tlâng taka kan duh leh tum ber - Naupang Sande Sikul hmun laih chu tuang taka kan thawh ho avângin kan lâwm hle.
- 9. Thu belh:** Lungsen Kohhran hian Naupang Sande Sikul hranpa nei lovin Biak Inah an inkhâwm ho vek thîn a, eng eng emaw harsatna an nei thîn a ni. Sande Sikul hmun tûr Biak In sira an neih hi lei laih tûr hautak deuh mai a ni a. An tlêm si a, khâwl hmanga laih leh a vung paih zêl ngai a ni a, a hautak hle a ni. Tûna kan thawh bâk pawh hi sum tam tak sen ngai a la nih avângin Naupang Sande Sikul an neih ve theih nân ngaih pawimawhpui an thul hle.

*F. Lâwmsanga, Secretary*

*New Serchhip Kohhran RT Committee*



G.

1. Field hming : Home Mission North
2. Khua : Damparengpui
3. Tlawh hun chhûng : Ni 15-18, April, 2014
4. Tlawhtu : Saikhamakawn Kohhran
5. Kal zat : Mipa – 12, Hmeichhia - 5
6. Tlawh chhan : Biak In sak leh Good Friday hmanpui
7. Senso zat : ₹ 54,390

8. **Lâwmawm lam:** Kohhranho Pathian hnêna kan ãawngtâina rah chhuah avâng chauha kal thei kan ni. A hmun kan thlenin Pastor Laldusaka leh thawktute leh Kohhran Committee-te'n thingpui tui tak nê min lo hmuak a. Kan riah khâwmna tur Biak In sak thar nuam takah min thlen khâwmtîr a. Kohhranhote nê in pawh lâng takin hna kan thawk ho ãin a. Khaw lum hrechang lo léka hna kan thawk lâng chu thlarau kaihhruaina kan chang lâng tih a chiang hle.

9. **Lâwmawm lo lam:** Damparengpui hi Bru khawpui ber a ni a, in leh mihring pawh an ãahnem a. Kohhran páwl dang 5 lai a awm. Beràm inrûksak a tam avângin thawktute leh Kohhranho ãawngtâipui an ngai hle.

10. **Thu belh:** A hausak ren rual loh a lo lang a. Kan kalna tùrin Bus leh Bolero a neitute'n phal takin an rawn thawh a. A hmuna kan thawh ber chu Biak In ban khúr laih, an ruahman ang chu lai zovin, *ràwrá* ãin tam tak kan chhutsak a. *Ràwrá* leh balú an neih sa kan dah ãhatsak a. *Bookroom*-a hman tùr lehkhabu dahna chhuar 4 leh sikula mi tùr ãhutthleng leh dawhkan 7 ve ve kan siam zo bawk. Kohhran Hmeichhiain an thuamhnaw thawh khâwm ip tam fé kan kensak bawk a. Good Friday chhûngin Upa Lalzama leh Pu C. Vanlalsangate'n wawi hnih ve ve, Damparengpui leh Hmar Veng Kohhranah Pathian thuchah an sawi a. Nl. Jenifer Lalremruatin inkhâwm apiangin zaia rawngbâwlina a nei bawk. Kan hawn dáwnin Kohhranah ₹ 10,000 kan hnutchhiah a. Ni 19.04.2014-ah tuang takin kan veng kan thleng leh ta.

R. Chalkhuma

*Saikhamakawn Ramthar Committee Ziaktu*

*[Pathian zârah 'Ramthar Feh' hi a ãahnem deuh a. Duh hunah a chhuak thei ãin lo va, chhiartute hriatthiamna kan dil e. - Editor ]*

## SÛNNA

## PU T. VANLALRUATA (1970-2014)

Pu T. Vanlalruata (Pu Maruata) hi Pu Lalbiakthuma (L) leh Pi Lalhmuaki te fa 10 zînga a naupang ber niin ni 08.01.1970 khân Ramhlun South-ah a lo piang a. Zina lamah chuan kum 1988 khân Matric a pass a ni. Saitual North Kohhran ațanga *missionary*-a chhuak a ni.

Pu Maruata hian ni 19.02.1990 khân Synod Mission Board hnuaiah Evangelist Teacher hna a zawm a. Kawrthindeng, Bungtlâng South, Tlabung, Zâwlpui, Damdep I-ah te a lo thawk tawh a. Damdep I-ah hian Headmaster hna thawkin a thih thlenga a thawhna hmun a ni.

Ni 08.02.1994-ah Pi Vanlalbiai nêh inneiin fa pali -(1) Benjamin Vanlalawmpuia (2) Vanlaldinglian (3) Vanlalhruazeli (4) Vanlalruatdiki te an nei a ni. A nupui hi Pu Saiphunga (L) leh Pi Lanthangi (L)-te fa niin Evangelist Teacher a ni a, kumin 2015 ațang hian Damparengpui, Home Mission North-ah a thawk țan a ni.

A hrisêlna a țat tâwk loh avângin hun rei tak theih ang angin enkawl a ni a. Kum 2013 September thla-ah a kâl (*kidney*)-a lung tê awm hi hriat chhuah a ni a. A kala lung tê awm hi a ril deuh avângin Aizawla doctor-ten NEIGHRIM, Shillong-a kal tûrin an ti a. Ni 01.04.14-ah *admit* a ni a, ni 14 April-ah damdawi in ațangin a chhuak a. Hemi țam hian lung tê hi an lo chhut sawm zawh loh avângin a hnûah țam hnih an chhu nawn a. *Doctor*-te chuan a țat vek thu leh a zun chhuah mai theih tûr thu an lo hrilh a. Eng emaw zât zung chhuak mah se, a la chhuah kim loh avângin a țam li nân ni 22.10.14 khân Shillong panpui leh a ni a. Mahse a kâla lung tê awm hi a lo sawm vek tawh avângin an khawih ta lo va. Thla thum ei tûr damdawi an lo chawh a.

Shillong-a an chàm chhûng hian a khua a sik zeuh zeuh avângin *doctor* an ráwn reng a, mahse a natna hi hriat chhuah a ni lo va. Ni 31.10.2014-a damdawi in ațanga a haw chu a khua a sik leh a, a mit a lo éng țan a. A tûkah Aizawl-ah chhohpui a ni a. Ni 03.11.2014 -ah Aizawl *Civil Hospital*-ah *admit* a ni a. A natna chu a zual zêl a, a taksa zawng zawng a lo éng vek a. Theihtâwp chhuaha enkawl a ni a, thisente pein, *dialysis* pawh wavi lí lai tih a ni a. Mahse a thin lian nasáin a kâl a khawih nasat deuh tawh avângin a zung thei lo va, a inthiar thei lo leh zêl a. Tichuan, ni 10.11.2014 zîng dâr 6:50-ah Pathian hnênah thlamuang takin a chàwl ta a ni. Hemi ni vêk hian Rev. Lalchuanmawia, Secretary, SMB chuan Ramhlun Vengthlangah a vui a ni.

Pu Maruata hi mi ngawichawi, dik leh ța nia a hriatah chuan nghet taka ding tlat țin a ni. Rawngbâwlpui nuam tak, mi inpe tak leh thilphál tak, thawhona ța ngai pawimawh mi tak a ni baw. *Synod Mission Board*-in Pu T. Vanlalruata hi a ui tak zet a, Pathianin he thihna hi nasa takin mal a sàwm ang tih a beisei tlat a ni. A kalsan, a nupui fanau leh ramthar rawngbâwlina atán i țawngtai zêl ang u.



**Hmawngbu SHMS Silver Jubili - Ni 25 Nov. 2014**



**Hruiduk, H/M North, Missionary-te Chanchin Ṭha hrilna  
lamtluang**

### **COUNSELLING MAMAWHTE TÂN**

Mi mal, nupa, fanâu, chhôngkua, nulât tiangvai, ringtu nun  
adt.-ah harsatna i neih chuan Family Guidance & Counselling  
Centre pan ṭhin la, an lo ṭanpui ang che. Telephone leh inter-  
net hmang pawhin biakrâwn thaeih an ni.

Main Centre: Mission Veng, Aizawl - Ph.0389-2324443

Branch: Chanmari, Aizawl - Ph.0389-2306693

Vaivakawn, Aizawl - Ph.0389-2344324

Champhai - 0389-234055 - email: synodfgcc@gmail.com

Postal Regn. No.MZR/46/2015-2017

RNI Regn. 40889/88



*KAN THEN TĀK*  
T. VANLALRUATA, Hdm. Damdep-1, H/M 'S'



**Kan Missionary chēnna In Boleng Bial  
Arunachal 'W'**

<b>TO</b>
<b>RAMTHAR</b>

If not delivered please return to:  
The Manager  
Ramthar Chanchinbu  
Synod Office, Aizawl, Mizoram,  
India. Pin - 796005

**Published by Rev. Lalchhuanmawia and Printed at the  
Synod Press, Aizawl on behalf of Ramthar Association,  
Aizawl, Mizoram. Copies- 28,800**

**Visit us: [www.mizoramsynod.org](http://www.mizoramsynod.org)**